

Udin, ai 19 di Novembar dal 2014

ARLeF: trê bants pe promovion de lenghe furlane te editorie, ricercje sientifiche e tal spettacul

Tiermin par presentâ lis domandis ai 9 di Dicembar, 107 mil euros i fonts a disposizion

La ARLeF (Agenzie Regjonâl pe Lenghe Furlane) e à mandât fûr trê bants pe promovion de lenghe furlane tai setôrs de editorie, de ricercje sientifiche e dal spettacul.

I impuarts metûts a disposizion a son, par ogni bant di: 10.000 euros, 15.000 euros e 81.920 euros.

«Cun chest secont bant – al dîs il president de ARLeF, Lorenzo Fabbro -, a cressin a 254 mil euros lis risorsis diretis metudis a disposizion, tal 2014, pal supuart ae promovion de lenghe furlane in chescj trê setôrs strategjics pe cressite culturâl e sociâl de nestre comunitât».

Pe editorie, al è previodût il finanziament pe realizazion di un portâl on line pe divulgazion sientifiche e la relative riviste di cjarte, almancul semestrâl. Pe ricercje sientifiche e ven supuartade la creazion di une rêt di Istitûts di scuclis secundariis di secont grât cul fin di svilupâ l'ûs dal sisteme di aprendiment integrât (Clil). Par finî, si finanziin la realizazion di spettacui teatrâi o musicâi in lenghe furlane par fruts e fantats, azions di promovion de lenghe tal setôr dai grancj events di nivel regjonâl e un o plui cors di formazion par grancj sul teatri. A puedin vê acès ai contribûts ents publics e sogjets privâts (fondazions, associazions e altris ents cence fins di vuadagn, impresis e societâts). Pai materiâi scrits si domande di doprâ la grafie uficiâl de lenghe furlane.

Lis domandis a varan di rivâ te sede de Agenzie (vie della Prefettura 13, Udin) **dentri des 12.00 di martars ai 9 di Dicembar dal 2014**. I obietîfs specifics di ogni bant e lis modalitâts di presentazion des domandis si cjatin tal sît www.arlef.it e dutis lis informazions si puedin domandâ al numar: 0432.555847, o ben vie e-mail a: federica.angeli@regione.fvg.it.

<<<<<<<<<<<<